
CHI INCHEN









## кондакъ 1

збранная седмерице, во еже о ней хвалити Бога во вся дни жизни нашея, святии мученицы царственнии, оумолити Судию грознаго и неумытнаго, грядуща судити живымъ и мертвымъ, да седмижды седмдесятъ ослабитъ, оставитъ всемъ поющимъ вамъ: Радуйся, радосте седмицветная, завете спасения русскаго въ покаянии.

## икосъ 1

Ангели Божии есте, оускоряющии исхождение наше отъ котловъ египетскихъ, отъ радостей потопныхъ, отъ рожецъ





свиний: о святии мученицы рода царского: послани ныне есте роду нашему Царство приблизившееся возвестити, отъ покаяния приемля ны во своя си, Русь Святую Небесную, идеже оуповаемъ пети о васъ:

Радуйся, царю Николае, Христомъ Богомъ царствующий; радуйся, имже отечества Небеснаго и земнаго сподобляемся. Радуйся, милосердая царице Александро Новая, страданьми твоими струпы греховные наши обязующая; радуйся, царевичу Алексие, защитниче теплый целомудрия. Радуйся, мудрая дево царевно Ольго, невеста святая Руси Святой; Радуйся, мудрая дево царевно Татиано, погубившая душу, обретшая ю. Радуйся, мудрая дево царевно Марие, мироносице новая повапленнымъ нашимъ сердцамъ; радуйся, мудрая дево царевно Анастасие, веселие вечное надъ главами нашими. Радуйся, седмерице трубъ рожаныхъ, вострубите, во еже падетъ вознесенная наша гордыня.

# кондакъ 2

Видящи святые мерзость запустения на месте Руси Святой вящще неже седмдесятъ летъ, себе же самехъ поносимыхъ, иждиваемыхъ, всяцемъ злымъ глаголомъ реченныхъ ради Христа даже до днесь, Господи: вопиютъ Спасу: не просимъ тебе седмь разъ простити ихже не ведаютъ, что творятъ, но якоже реклъ еси Петру, да и тии поютъ: Аллилуиа.

# икосъ 2

Разумъ недоразумеваемый разумети ересь саддукейская аще ищещи поныне, главному догмату православия не верующи, зри оубо тацехъ седмь, кийждо отъ нихъ есть венецъ Руси, законные бо обладатели земли и народа соуть, обаче блудодействова земля и народъ отъ Закона Божия: аще ли гладствовавши въ себе приидетъ, сице зовущи: Радуйся, царю Нико-









лае, царскую диадиму мученическимъ венцемъ оуяснивый; радуйся, воиномъ Христовымъ до гроба бывый. Радуйся, царице Александро Новая, мудрость любовию о Христе свидетельствуяй; радуйся, царевичу Алексие, иже яко овча на заколение ведеся. Радуйся, царевно Ольго, въ годину буихъ мрачныхъ дней дивно процветшая; радуйся, царевно Татиано, матере твоея неизреченная таиннице. Радуйся, царевно Марие, бдящая на молитве за нощь России несветлую;

радуйся, царевно Анастасие, радосте ангеловъ. Радуйтеся, седмь, имущие обладати Россиею, иже яко ангели на Небесехъ, бывшие ей на земли.

# кондакъ 3

Сила Вышняго осени тогда яко едиными оусты глаголати царственныхъ мучениковъ: Русские есмы, и хотениемъ восхотели есмы оумрети въ России, егда самое имя сие постыднымъ непщуется даже до днесь въ стране нашей: якоже седмь оубо зеренъ, падъ въ землю нашу, седмь тучныхъ класовъ питающихъ ны паче неже седмдесятъ безплодныхъ летъ, подали есте намъ, поющим: Аллилуиа.

## икосъ 3

Имущи Богоприятные камени во время оно Господь, языцы, во тьме и сени смертной сидящии, чада Аврааму соделаль есть: обаче и самое камение разседеся, не терпя страданий Христовыхъ: да не возглаголемъ ныне: чада есмы отца всехъ русскихъ, отца имамы царя Николая, аще не творимъ плодъ достоинъ покаяния, поюще:

Радуйся, царю Николае, готовое наше покаяние; радуйся, каменныя сердца наша пременяяй на плотяныя. Радуйся, царице Александро Новая, на царстве юродою сущая; радуйся, царевичу Алексие, всесожжение за грехи народа твоего. Радуй-







ся, царевно Ольго, рай изгибшего отечества нашего; радуйся, царевно Татиано, радующаяся, идеже мы ропщемъ.

Радуйся, царевно Марие, любящая любвеоставленныхъ; радуйся, царевно Анастасие, радосте безрадостныхъ. Радуйтеся, имиже, аще седмищи на день согрешаемъ, седмищи на день обращающихся приемлетъ ны Господь.

## кондакъ 4

Бурю внутрь имея помышлений соумнительныхъ о царственныхъ мученикахъ некий списатель житий святыхъ, оузревъ седмь струй мура точащу икону царя Николая, принесе теплое покаяние: прочее слышимъ евангельский гласъ: и аще кто отъ мертвыхъ воскреснетъ, не имутъ веры. Мы же царственнымъ муроточцамъ поемъ: Аллилуиа.

## икосъ 4

Слышаша архипастырие соборнии перваго среди равныхъ, глаголюща: аще кто непщуетъ нуждно быти царю прославлену, да потщится возстати: вси оубо последоваща возставшу ему: Полнотою Церкви Небесной и Земной совершившуся, вси поютъ мученикомъ царственнымъ:

Радуйся, царю Николае, послушания отча никогдаже бежавый; радуйся, волю Отца Небеснаго всегда разумевый. Радуйся, царице Александро Новая, правды токмо Христовой алкавшая; радуйся, царевичу Алексие, отроковъ о чистоте непреклонная дерзосте. Радуйся, царевно Ольго, боящаяся огорчити отца огорчениемъ ближнихъ его; радуйся, царевно Татиано, не испытующая, но испытуемая. Радуйся, царевно Марие, яко и ты еси во бранехъ помощнице намъ; радуйся, царевно Анастасие, радосте целая отроковицъ невестныхъ. Радуйтеся въ Церкви Седмисоборней, собирая овцы Единому Пастырю.







# кондакъ 5

Боготечнии звезды есте, звезде Вифлеемстей подобяся: седмерицею оумножая светолитие надъ хладнымъ и темнымъ вертепомъ, иже ныне весь миръ есть: аще ли не паки Грядущему со славою сияете, пристрашно вопиющи: Се Женихъ грядетъ, Аллилуиа.

## икосъ 5

Видяще отроцы седмь во Эфесе, иже о Максимилиане, посмеявающиеся ереси саддукейской о еже не быти воскресению: аще несть воскресения, вся дозволена соуть: оузримъ же и седмь царственныхъ, ратуемыхъ даже доныне: брань же сия истинное есть оуверение вечныя жизни ихъ во Христе: да не оуслышимъ, иже все слышатъ не почитающие царей въ Неделю Православия, да присно поемъ о царехъ:

Радуйся, царю Николае, пастырю добрый народа русскаго; радуйся, имже открываются помышления многихъ сердецъ. Радуйся, царице Александро Новая, семей во Христе охранительнице; радуйся, царевичу Алексие, возсиявый во время посещения твоего. Радуйся, царевно Ольго, ведущая матернее въдевстве твоемъ; радуйся, царевно Татиано, послушнымъ духовный слухъ отверзающая. Радуйся, царевно Марие, изми нозе мои отъ поползновения; радуйся, царевно Анастасие, радосте всехъ поющихъ тебе. Радуйтеся, иже яко седмь агнецевъ непорочныхъ единолетныхъ, всесожжение Богу приятно оустройте души наша.

# кондакъ 6

Проповедницы Богоноснии бывше седмь седмерицъ летъ святии царственнии мученицы: вами бо вопиялъ есть Спасъ Всемилостивый: милости хощу, а не жертвы: беззаконне мило-









вали сиротъ и вдовицъ чрезъ все житие ваше: юбилейному году наставшу, беззаконне субботствующихъ милуете страшно, ихъ жертвоприношению соизволяя, аще ли ни останокъ покается, вопиюще о царехъ Богу: Аллилуна.

## икосъ 6

Возсиявый во Египте новомъ просвещение тьмы, паки иже о Иосифе изобразуещи намъ: седмью хлебами лепоты дивной насыщаещи тысящи гобзующихъ: яко седмью тучными годами избыточествуеши седмидесяти летомъ безплоднымъ: въ дому Отца моего наемники колицыми избыточествують хлебы: призывая вопити насъ, гладствующихъ на чуждей стране, да воспоемъ седмерице царственней:

Радуйся, царю Николае, столпе веры православныя; радуйся, твердое Церкве ограждение. Радуйся, царице Александро Новая, сестра милосердная народа твоего; радуйся, Алексие, новый царевичъ оуглический. Радуйся, царевно Ольго, радующаяся воле отчей; радуйся, царевно Татиано, правило послушания. Радуйся, царевно Марие, жажду Небесныхъ даруй намъ; Радуйся, царевно Анастасие, радосте жизни во Христе. Радуйся, седмеричное погружение нееманово, очищение неисцельной гордыни нашей.

# кондакъ 7

Хотяй всемъ человекомъ спастися и въ разумъ истины приити, многочастие и многообразие глаголетъ намъ Богъ мучениками царственными: аще восхощемъ молитися царю Николаю, всей семье молимся, седмерицею на всякъ день хваляще Господа: аще ли прильнемъ къ милосердой царице, абие седмь помазаний имамы духовныхъ: ко царевичу ли возопиимъ, зримъ целокупно седмисвечникъ пресветлый: плачемъ ли Ольге, вси оубо седмь звездъ боготечныхъ кротце сияютъ намъ: смиряемъ







егда себе предъ Татианою: седмь даровъ Духъ Святый изливаетъ на насъ: бодрствуемъ ли со Мариею, шесть оубо дний творимъ волю Божию, да въ седмый Его покой обрящемъ: жительствуемъ ли въ Анастасии, истинно субботствуемъ воскресно: малая церковь есте, мученицы царственнии, седмотаинственно благодатствуя всехъ, поющихъ о васъ: Аллилуиа.

## икосъ 7

Новые водоносы оуставляеть Женихъ Небесный на браке Руси Святой: егда людие русские, оупившиеся благоденственнымъ мирнымъ житиемъ, здравиемъ же и спасениемъ, и во всемъ благимъ поспешениемъ Божиимъ, благодарни быти не восхотели соуть, врашщася, псомъ подобно, на язычество свое: тогда седмь оубо водоносовъ исполнилъ есть Христосъ даровъ благодати и истины, седмь святыхъ царственныхъ мучениковъ, дивящимся всемъ, како сберегъ Сый доброе сие вино до последнихъ дний, въ нихъ же оупоеваемии, поем:

Радуйся, царю Николае, кротце вся простивый; радуйся, землю Русскую навеки наследовавый; радуйся, царице Александро Новая, яко тобою спасутся тысящи. Радуйся, царевичу Алексие, источниче благодати; радуйся, царевно Ольго, словесы чисты Бога о России молящая. Радуйся, царевно Татиано, вкушение сладости затворения; радуйся, царевно Марие, точащая воду животную изъ камене. Радуйся, царевно Анастасие, невинно страждущихъ Пасце причащающая; радуйся, благодать седмеричная, иже безплодны творитъ отцы множества.

# кондакъ 8

Странное о царственныхъ страстотерпцехъ видяще, яко едину имели велию скорбь, егда разлучатися семье: оубоимся Баголющего: иже Богъ сочета, человецы да не разлучатъ: возопиимъ Сочетателю всяческихъ о Семье во Христе: Аллилуиа.







#### икосъ 8

Весь бе въ нижнихъ, Христу последуя, страстотерпецъ святый царь Николай, даже до ада малое стадо съ собою ведый: никогдаже стремился властвовати, обаче двадесять и три года твердо кормилъ есть кораблецъ русской державы: веруя въ харизму свою, смирился до оумаления славы ея: любящий жену и детей, монахъ былъ готовъ стати: наконецъ же отречение России любовию покрылъ есть, и ныне ведеши семью на заколение, въ снедь алчущимъ любве желая принестися, пепелъ падений нашихъ растворяя виномъ неотступнаго отцовства твоего, плачущимъ и рыдающимъ намъ сице:

Радуйся, царю Николае, всякую болезнь врачуяй; радуйся, изъ тьмы кромешной и топи изводяй. Радуйся, царице Александро Новая, оупокоение страждущихъ; радуйся, царевнчу Алексие, веселие безпомощныхъ. Радуйся, царевно Ольго, оутешающая отечестволюбцевъ; радуйся, царевно Татиано, давидствуящая противу голиафа западнаго. Радуйся, царевно Марие, неверныхъ гласа совестнаго слышание; радуйся, царевно Анастасие, радосте, смерть попирающая. Радуйтеся, маккавеи новые: аще ли в седмих покаемся.

# кондакъ 9

Всякое естество ангельское оудивися, зряще таинство седми звездъ, иже ангели церкви и земли русския, полноту благодати изливая коемуждо кающемуся сердцу, иже милися плачетъ: Аллилуиа

## икосъ 9

Ветия многовещанныя двадесять и три степени низу непщують царствие ваше: мы же схождение страшное празднуемь, царственный воистинну оубо кенозись христоподражательный, паки зряще лествицу иаковлю, и седмь оубо ангелы Божии, иже сходять по ней къ немощнымъ нашимъ мольбамъ, и воз-







носять сии ко престолу Славы, всемь поющимь о нихъ:

Радуйся, царю Николае, новыя страны народомъ русскимъ населивый; радуйся, яко сей народъ твой злобой немствующихъ победилъ есть. Радуйся, царице Александро Новая, являяся, аки служащая; радуйся, царевичу Алексие, суемудрыя студа исполняяй. Радуйся, царевно Ольго, по покаянии любы благовествующая; радуйся, царевно Татиано, бремя немоты нашея молитвой облегчающая. Радуйся, царевно Марие, моления детские исполняющая. радуйся, царевно Анастасие, радосте наедине предстояния Христу. Радуйтеся, седмь, иже яко седмдесятъ толковниковъ, истолкуйте ны благоприятне на Суде.

# кондакъ 10

Спасти хотя миръ, иже всехъ Оукраситель, седмь оубо таинствъ въ Церкви своей положилъ есть: велию тайну предлагаетъ Богъ намъ царственною седмерицею, за еже спастися Израилю Новому, останку Руси Святой, седми оубо тысящамъ, не преклоньшимъ колена передъ ваалами и астартами, седмерицею поюще: Аллилуиа.

#### икосъ 10

Стена огустевшихъ водъ есть страдания ваша, мученицы царственные, мы же немокренно преходимъ житейское море, моляся вамъ, выну зря дугу седмицветную предъ собою, Господеви поемъ: славно бо въ васъ прославися:

Радуйся, царю Николае, стено необоримая Церкви Христовой; радуйся, мира всего зло оудерживаяй. Радуйся, царице Александро Новая, защитнице российская; радуйся, царевичу Алексие, тепле кающимся целомудрие возвращаяй. Радуйся, царевно Ольго, остененная всехъ девъ стеной; радуйся, царевно Татиано, гласъ хлада тонка непшующимъ о царе. Радуйся, царевно Марие, текущая на гробъ России четверодневной; ра-







дуйся, царевно Анастасие, радосте нееманова седмеричная. Радуйтеся, стены иерусалимския послеплененныя, доме, иже создалъ есть Господь.

# КОНДАКЪ 11

Пение всякое наше побеждается пениемъ вашимъ, иже яко седмь священницы съ седмью трубы рожаны седмерицею обходите вознесенный оплотъ самозданной темницы нашей: аще ли не падетъ страстный сей нерихонъ? Мы же чающе свободитеся во Христа, поемъ: Аллилуиа.

#### ИКОСЪ 11

Светоприемный седмисвещный светильникъ зримъ мучениковъ царственныхъ, седмь цветовъ радости послепотопной облиставающихъ нам: идеже преподобноцветенъ есть царь Николай, и въ темнаго пурпура ризахъ Новая Александра-царица, мученикъ же царевичъ Алексий Димитрию-царевичу и Гавриилу Белостоцкому цветомъ подобенъ, тамо голубицею царевно Ольга, и въ небесныхъ цветахъ царевна Татиано, иже благую часть избра, царевна же Мария златосиянно просвещаетъ насъ, и юнотка царственная Анастасия, яко пламень огненный: преклоньшие лица на землю, и боящияся, обаче поемъ сице:

Радуйся, царю Николае, чашу горькую въ народа место испивый; радуйся, яко Пасха русская явился еси. Радуйся, царица Александро Новая, верная России въ Бозе даже до смерти; радуйся, царевичу Алексие, сострадание точащий. Радуйся, царевно Ольго, еюже просвещаетъ царь тьму нашу; радуйся, царевно Татиано, благословение домомъ. Радуйся, царевно Марие, разстоящияся любовию сочетающая; радуйся, царевно Анастасие, радосте Всехитреца Господа. Радуйтеся, седмь свещниковъ огненныхъ, горящихъ предъ престоломъ Троицы Святой.







# кондакъ 12

Благодать дати восхотевъ преизбыточествующую шестью денми творитъ миръ Господь, седмый же день благословляетъ, за еже освятити его: седмерица же царственная дадеся намъ, во еже освятити людие свои покаяниемъ, имиже новотворитъ Богъ насъ людие быти паки, иже сташа персть и гной, за еже спастися поюще: Аллилуиа.

#### икосъ 12

Поюще коемуждо отъ васъ, всякия беды и напасти, паче же оуныния и отчаяния избавляемся, поюще же собору вашему, якоже соборне помазуемся елеемъ святымъ, аки певаемы отъ

васъ, мняще зрети васъ сице:

Радуйся, царю Николае, всякое прошение исполняяй; радуйся, помощниче прежде прошения нашего. Радуйся, царице Александро Новая, еяже слава вся внутрь есть и доныне; радуйся, царевичу Алексие, веры истинныя оуверение. Радуйся, царевно Ольго, на всякое время и часъ сходя въ купель покаяния нашего; радуйся, царевно Татиано, яко во аде довлела есть ти любы Христова. Радуйся, царевно Марие, елеоподательнице девамъ оуродивымъ; радуйся, царевно Анастасие, манно веселия въ пустыни житейской. Радуйся, соборе елеофорный, помазуяй язвы наши седмерицею.

# кондакъ 13

О святыя седмь ветвей чудоточной Христовой лозы, яко седмь даровъ Приснопоклянаемого Духа Святаго точащия намъ, отъ нихъ же Духомъ Страха Божия аще ли не сияетъ намъ царь Николай, и испускает лучи Духа Благочестия Новая Александра царица: Духъ же Разума о Христе стяжаветъ для насъ цесаревичъ многострадальный Алексий, Ведениемъ светится Ольга, и Советомъ Татиана: Крепостию блистаетъ Мария: Духа Премудрости каплетъ намъ царевна Анастасия, це-









локупно же зримы соуть седмь златыхъ огней седмисвещника алтарнаго, просвещая и освящая поющихъ о вас: Аллилуиа.

Сей кондакъ глаголи трижды, и паки первый икосъ и первый кондакъ.

#### молитва

О освященный соборе святых в мучеников царственных в Кийждо отъ васъ непреложно есть изряднейший чудотворецъ и целебникъ: аще ли единаго отъ васъ призываемъ во обстоянияхъ, веруемъ абие спасены быти за любовь вашу ко Христу Богу нашему. Обаче тяжкие соуть яко никогдаже прежде греховныя немощи наша: отступление наше аще ли не падение превратися: самая воля ко спасению оуже поразилася, и не вемы, что есть спасение, довольнии есмы египетствомъ нашимъ.

Темже, неспособнии принести истинное совершенное покаяние, изнемогшии теломъ и душею, не могущие исповедать срамные наши грехи, иные же и забвенние соуть, паки же и исповеданные тяжкие грехи наша, отъ юности и отъ науки злы, доныне терзаютъ совесть нашу, къ вамъ вопиемъ изъ глубины смрадной нашей темницы: о освященный соборе царственный! Веруемъ, яко седмочисленному составу вашему даде Господь Богъ туюжде благодать, якоже и въ таинстве елеопомазания: освятите оубо молитвою вашею ны, немощные, отпустите греси наши и очистите совесть отъ всякия скверны: да облегчаеми предстательствомъ вашимъ, вперени будемъ къ небеснымъ,

идеже вы присно славите Безначальнаго Отца со Присносущнымъ Его Сыномъ и со Пресвятымъ и Благимъ и Животворящимъ Его Духомъ, всегда ныне и присно, и во веки ветковъ, аминь.

# Фонд Святителя Иоанна Шанхайского и Сан-Францисского Чудотворца, Россия, Москва. Тел/ факс: (095) 280-12-80

info@adamovka.ru